

Kumpul maklumat 6,400 rumah terpilih

IPOH - Sebanyak 6,400 tempat kediaman yang terpilih meliputi semua daerah di negeri ini akan terlibat dalam penyiasatan pendapatan dan perbelanjaan isi rumah 2016/2017 yang akan bermula Mei ini hingga April tahun depan.

Timbalan Ketua Perangkawan Program Sosial dan Demografi, Dr Mohd Uzir Mahidin berkata, pengumpulan maklumat taburan pendapatan dan perbelanjaan isi rumah itu untuk dijadikan rujukan utama kerajaan dalam memantau, menilai dan memberi arah tuju baharu kepada dasar sosioekonomi negara.

Menurutnya, data yang terhasil juga akan membolehkan penyediaan indikator kepada 'sustainable development goals' serta digunakan dalam pengiraan wajaran Indeks Harga Pengguna selain merupakan perkara asas dalam pembentukan pendapatan garis kemiskinan.

"Maklumat yang dikumpulkan ini tertakluk kepada peruntukan Akta Perangkaan 1965 (Disemak 1989) malah bagi Seksyen 5 di bawah Akta ini mengehendaki mana-mana responden di Malaysia untuk memberikan maklumat sebenar atau anggaran terbaik kepada jabatan.

"Melalui akta ini juga, kandungan soal selidik yang diterima adalah sulit dan tidak dihebahkan kepada sesiapa atau mana-mana institusi di luar jabatan ini. Jadi kita minta kerjasama daripada semua pihak terutama responden untuk menjayakan penyiasatan pendapatan ini seterusnya membantu kerajaan membuat perancangan yang tepat," katanya ketika merasmikan program Sesi Interaktif bersama Ketua Masyarakat / Komuniti bagi Penyiasatan Pendapatan dan Perbelanjaan Isi Rumah 2016/2017, semalam.

Mengulas isu pengangguran, beliau berkata, mengikut data, hanya tiga peratus daripada 14 juta tenaga buruh di negara ini masih belum mendapatkan pekerjaan.

Katanya, tenaga buruh yang dimaksudkan ini adalah mereka berusia antara 15 hingga 64 tahun yang sudah bekerja dan sedang mencari pekerjaan.

"Jumlah pengangguran tersebut hampir 500,000 orang iaitu setengah juta. Jika dilihat pada kadarnya memang sedikit tetapi dari segi bilangan agak besar.

"Dalam hal ini, kerajaan perlu pastikan perancangan tepat dan usaha berterusan untuk memajukan negara seterusnya setiap individu mempunyai peluang pekerjaan," katanya.